

MBANGILU NÈ NDEKEELU

WA CIPUNGU CYÀ BÀÀ

BISÀMBÀ BYÀ BENDÈ

 Mwoyi wènú awu dilòlò edi, balundà bàànyì. Ndi nè kusàkidila kwàbùngì bwà kwikala kaaba aka, dilòlò edi, cyàkàbìdì. Ndi mfùma ànu ku dyumuka kaaba aka, kùkaadi katanci. Ndi ngèèla meeji nè ndi mupàtùke twipacila pa dībà ìnaayi jaajaaja. Nè pashìishe mvwa nè cyà ku...tuvwa bayè kamòna balundà bakwàbò kàbìdì. Nè kwalukila, tusunsa tùtaanu paanyimà pàa dībà mwandamutekète, kukèngelabi ànu bwà kwalukila. Pa nàнку mu mùshindù kampàndà ndi nè cyà kwanji kukeba cyena-bwalu kampàndà's, Mwanèètù Neville.

² Kàdi, mpindyewu, kùdì dilòmba òwà difùma ku dibwela ku dibìikila, kùdì muntu kampàndà mu Chattanooga, mu Tennessee, munanga kampàndà uvwa mupetàngàne nè njiwù kùkaadi mbingu yisàtù, nè mmulààle kàyì mwà kumanya cintu, too nè mpindyewu. Nè ùdì ùlòmba disambila kaaba aka, dyà èkèleeziyà ewu. Nè...

³ [Mwanèètù Neville ùdì wàmba nè: “Mwanèètù Bill?”—Muf.] Èyowà's, mwanèètù? [“Ndi mwà kufila dimanyisha anyi?”] Ncyà bushùwà nè udi mwà kufila. Mwanèètù Neville, lwàkù ànu's. [“Mfwilèku luse, Mwanèètù Bill.”] Èyowà's, mukalenge. [“Nkààvwa mwambè kupwà mwoyi, ndi mufile mulayi bwà kufila dimanyisha dilòlò edi.” Katùpà kàa mukàbà wà mèyi munda mutupù.]

⁴ Tuvwa—tuvwa twakula bwà Melekisedekè, nè Yèyè ùvwa Nganyì, nè katwèna nànsha pabwìpì nè kuciikija to. Kàdi pàmwàpa, musangu wàlonda, tudi mwà kwangacila mwaba awu, ànu mu Mukàndà wà beena Ebèlù awu.

⁵ Kàdi, dilòlò edi, tudi tubuulula mu Mukàndà wà Danyèlè. Nè nwènú nè Bibles yènú ayi, buulùlaayi mu Danyèlè 12. Nènku netwikalè mwà kubalakù ndambù kuumukila apu, nè kuyiikila, pàmwàpa, pa ndambu wa Dìyi dyà Nzambi mu Mukàndà wà Danyèlè.

⁶ Mpindyewu, Danyèlè ùvwa umwe wa ku...ùvwa mmupròfetà wàkambwibwa kuumukila ku Yelusàlèma, kupweka mu Baabùlòonà, mu dikwàciibwa dyà ku bupika dyà mu Baabùlòonà adi, kùdì Mfùmù Nebùkàndànéèsà. Ùvwa nsongàalùme wa citende pàakapwekàye mu Baabùlòonà apu.

Kakùvwa bààbûngì bààbò bàvwà kacya bààlama diitabuuja dinène dyà kale adi to.

⁷ Ndi muswè Danyèlè, bwalu wèndè. . . ùvwa mucipàngàdikile munda mwà mwoyi wèndè, pàakapwekàye mu Baabùlòonà, bwà nè ùvwa nè cyà kushàala mwena kwitabuuja, nè yèyè kàvwa mwà kudikooyisha nè byàkudyà byà mfùmù to, nè bikwàbò. Mpindyewu, cintu mene. . .

⁸ Nènku Danyèlè ùvwa mupròfetà kùdì bàà Bisàmbà byà bendè. Danyèlè wàkamòna cikondo cya bàà Bisàmbà byà bendè cyònsò cijuuka nè cipòna. Yèyè nguvwa wa kumpalà uvwa nè cyà kwikala, mutùtù tubiikila nè, mupròfetà wa bàà Bisàmbà byà bendè. Yèyè kàvwa wa bàà Bisàmbà byà bendè, yèyè mwinè to. Kàdi wàkamòna cipungu cyà bàà Bisàmbà byà bendè, kuumukila ku mbangilu too nè ku dijika; mu mutù wà ngòlò, nè cijikila mu makàsà à cyamù cifiike nè diima.

⁹ Nènku pàvwàye kuntwaku apu, mupàngàdike mu mwoyi wèndè nè kàvwa mwà kudikooyisha nè byàdidyà byà mfùmù, nè maalu à mfùmù to.

¹⁰ Nè kasumbù kakwàbò kàà bàna bèètù, mènà ààbù Shandàlàkà, Meeshàkà nè Abèdènègò, bàvwà kuntwaku naabò; bàvwà kabàyi bapròfetà to, kàdi beena kwitabuuja. Nènku bóbò, kàbìdì, bàakapàngadika mu mwoyi wàbò. Nè pashìishe pàakadisangisha beena kwitabuuja bànaayi abu pàmwè, ndi mwà kudifwànyikijila nè misangu yàbûngì, bàvwà bènza masangisha à milòmbò pàmwè.

¹¹ Ànu mutùdì twenza emu, tudi tudisangisha bwalu tudi nè bintu pàmwè. Nudi bamanyè's, kùdì cìfìdì cyà kale cìtù cyàmba nè: "Nyuunyi yà masàlà àmwè yìtù yàdisanga pàmwè," nènku aci's ndusumwinù lwà kale, èyowa's wè, nè cìine aci's ncintu cìmpè cyà dikèma, kàbìdì. Nyuunyi yà masàlà àmwè yìtù yàdisanga pàmwè. Kanwènaayikù nè disànkà bwà aci anyi? Bushùwà. Nyuunyi yà masàlà àmwè yìtù yàdisanga pàmwè.

¹² Ànu àbìdì àdì panshì aa, mvwa musòmbe mu disangisha mùvwà muntu kampàndà ùkòkangana pa cintu kampàndà. Ke yèyè nè: "Èè. . ." ùvwa wàkula bwà misùùkà yìvwà miyè ku bùlòkò, yìvwa mu bùlòkò, nè Yesù wàkaya nè wàkayiyiisha, paanyimà pàà lufù Lwèndè. Ke muntu mwinè uvwa wakula ewu, kwambayè nè: "Èè, nudi nwelakù pèènu meeji bishi bwà bwalu abu?"

¹³ Ke mwanèètù kampàndà wa bafiike kujuukayè. Kwambayè nè: "Èè, s'cidi ànu cìdì Bible mwambè aci. 'Wàkaya kayiisha misùùkà yìvwà mu bùlòkò.'"

Yèyè nè: "Udi wela meeji nè cìvwa ncinyi?"

¹⁴ Yèyè kwamba nè: "Yìvwa 'Mmisùùkà yìvwà kayiyi minyingalàle, mu cikondo cyà mwoyi mule, mu matùkù à

Noà, pàvwà bwátù munkaci mwà kulongolodiibwa apu to,' ànu mùdi Bible mwambè."

15 Yèyè nè: "To." Yèyè nè: "Awu ng'èkèleeziyà ewu, ùyiisha beena Mpenta abu bàdi munda mwà mângumba aa nè bikwàbò byònsò, ùbàpàtula mu bùlokò."

16 Yèyè nè: "Mpindyewu, tàngilà kùnweku, mwanèètù," yèyè nè, "Mpenta kàvwa nànsha mene mutèèdiibwemù to." Wàkamba, nè: "Wàkamba ànu cyanààna, nè: 'Wàkaya kayiisha misùùkà yìvwà mu bùlokò.'"

Ke mèmè nè: "Amen. Ncyà bushùwà."

17 Ke mwambi awu kukènzakanayè kuntàngila, nè kwamba nè: "Nyuunyi yà masàlà àmwè yìtu yàdisanga pàmwè."

18 Mèmè nè: "Ncyà bushùwà, bàna bèètù bàà Diitabuuja dyà mushinga mukolè dyà mwomùmwe, bàdi biitabuuja ànu cidi Mifundu yamba nè m'Bulelèlà aci."

Danyèlè ùvwa nè balundà bàsàtù bàà nànkù bàvwà nendè.

19 Nudi bamanyè's, mbîmpè, díbà dyúdi kule nè kwènù, bwà kupeta muntu kampàndà udi neebè, muntu kampàndà wíkala mwà kwimana ku luseke lwèbè aku, mulundà mwîmpè wa dikèma. Kaa, ekèlekèlè! Mu malaba à ku baabèndè, paùdi usangana muntu kampàndà udi muswè kwikala mulundà webè, nè mukunangè nè mutwè ku cyèbè, aci's cidi nè mushinga wàbûngi; nangananga mwenyi.

Nènku bàna bèètù aba bààkuumushiibwa mu cimenga cyàbò.

20 Nè cimenga cyàbò cìvwa cyoshiibwe. Nè mpànzà yàbò yònsò, nè bintu byà cijila byà Nzambi, bàvwa bayè naabi mu Baabùlòonà, nè bitèèkiibwe mu nzùbu wa bubanji wa Mfùmù Nebùkàndànèèsà, ùvwa muyè naabi kuntwaku, mfùmù munène, munène wa bàà Bisàmbà byà bendè. Mpindyewu, piikalàbi—piikalàbi nè Nzambi ùvwa mwanyishe cyôci aci, bwà cimenga cyàbò kwoshiibwaci, èkèleeziyà wabò kwoshiibwayè, nè kuya naabò ku cimenga aci, mbwalu bàvwa bayè kule nè Nzambi.

21 Kàdi Yèyè ùcìvwa ànu nè mwena kwitabuuja uvwaYè mwà kutèèka byanza Byèndè pambidi, kwamba nè: "Èwu mmusadidi Wanyì."

22 Nzambi ùtu misangu yònsò ànu nè ntèmù, mwaba kampàndà. Kacya Yèyè kàtukù ùDishiya kàyi nè ntèmù to. Nànsha byôbi nè, misangu mikwàbò kùtu kùshààla ànu umwèpelè, kàdi Yèyè ùtu misangu yònsò ànu nè muntu kampàndà udiYè mwà kutèèka byanza Byèndè pa yèyè, nè wamba nè: "Èwu mmusadidi Wanyì, nè yèyè neénzè mùNdi mmwambila amu." Mpindyewu, tudi baswè aci.

23 Pa kumòna díbà adi, nè, pàvwà bàna bèètù aba kuntwaku, bàvwa beediibwe ku diteeta.

24 Cileejilu cilenga cyà kùdi mwena kwitabuuja mulelèlè ùlwa pàdiye bulelèlèlè witaba Mukalenge Yesù bu Musungidi wendè. Ukaadi misangu yònsò ànu mwediibwe ku diteeta. Sàtaanà ùcidi ànu mu mudimu wà dyelangana ku diteeta. Nè didi dilwa ànu bwà kukukwàcisha. Mbwa bwîmpè bwèbè.

25 “Mwânà wa balùme yònsò udi ulwa kùdi Nzambi ùdi nè cyà kuteeciibwa, kunyookiibwa, kutuuciibwa minyànsù,” mu ngaakwilù mukwàbò, “kumutuuta kumoolola ndambù, kumululamijakù. Nènku pàdi Nzambi ùtùpèèsha dinyooka kampàndà, kàdi katùyì mwà kudítwàla to, díbà adi tudi tulwa bàna bàà mu masandi, katùyì bàna bàà Nzambi to.”

26 Mpindyewu, muntu udi cyà bushùwà nè mpàla wendè mutàngija mu Dyulu, nànsha cinyi cyenzeke pa buloba apa, ùcìcidi ànu nè mpàlà wendè mutàngija mu Dyulu. Balundà bèndè bàdi mwà kumulekela. Díkù dyèndè didi mwà kumulekela. Mpaasàtà wendè ùdi mwà kumulekela. Kàdi kùdi Kampàndà wíkala kàyì mwà kumulekela to; awu’s n’Nzambi. Nènku pàdi dipàngadika dyèbè dimana kwangata! Ndi muswè aci.

27 Danyèlè ùvwa mwòshè bilamba byònsò bìvwà paanyimà pèndè. Kàvwa nè meeji à kwalukila cyànyimà, kàbidì to. Kàvwa wòsha dísu mu kajilà kàvwà paanyimà pèndè to. Ùvwa mutàngile, ùpwa mwoyi bintu bikaadi bipite abi. Wàkakòlesha lwendu mutàngile ku kiipàcilà kàà dibikila ditumbùke. Ke cìvwà cìkèngelà twètù kwikala twenza ncyôci aci. Ke cìvwà Èkèleeziyà nè cyà kwikala wènta ncyôci aci.

28 Nènku mûndi mmòna, díbà adi, Nzambi wàkanyishila Sàtaanà bwà kumupìcishilayè ku diteeta. Nènku, kaa, bàakabàteeta, ku kapyà. Bàakabàteeta, kàbidì, ku bwinà bwà ntambwe. Nè mu bwalu bwònsò, Nzambi wàkabàpàtula, batàmbe too nè bacimunyi.

29 “Mateeta à mwakàne àdi àbúngì, kàdi Nzambi ùdi ùmusungila ku wònsò.” Mùshindù mwinè wùdibi bilenga bilayà’s wè! Mùshindù mwinè wutùdi twanyisha cyôci aci’s. Mateeta, makèngeshiibwa, dyediibwa dyà ku diteeta, byònsò abi biikàle bikwàta mudimu bwà dyàkalenga! Paanyimà pàa katanci, Nzambi ùdi mwà kumòna díbà adi nè Yèyè ùdi mwà kutèeka dyeyemena Dyèndè mu wèwè, nè pashìishe Yèyè neàkwenzèlè bintu binène.

30 Mpindyewu tudi tujandula, díbà adi nè, Danyèlè wàkalwa cyamù cyà mudimu mu cyanza cyà Nzambi, pàvwàye kule nè bàà kwàbò sungasunga apu, pambèlù pàa cimenga cyèndè sungasunga, kule nè èkèleeziyà wendè sungasunga, mu buloba bwenyi, Nzambi wàkakwàta nendè mudimu.

31 Mpindyewu, udi mwà kwikala kule nè cyònsò cyùdi mwà kwikala aci. Udi mwà kwikala kule nè bananga bèèbè bònsò, anyi udi mwà kwikala kule nè èkèleeziyà webè, kàdi udi ànu mwà kwikala cyamù cyà mudimu mu byanza byà Nzambi.

Nzambi ùdi mwà kukwàta neebè mudimu bwà bujaadiki anyi bwà cintu kanà cyònsò cidiYe muswè kukwàta neebè mudimu aci.

³² Bileejilu bilenga byà dikèma! Bible mmutàmbe kuula tètè nè bintu abi, mwaba wònsò wunùdì nubuulula awu. Kanwènaayikù banangè kubala Dìyì anyi? Kaa, ndi ànu nDìbala cyanaànà, mîngà misangu, kàdi ngààsa mwadi.

³³ Mwab'ewu kùkaadi ndambù wa matùkù, mvwa mbala mu cibambalu amu, nènku kukèngelabi ànu bwà mèmè kusòmba nè kudila mwadi bu mwànà wa mu dibòkò. Mèmè kujuuka kuulu nè kunyùnguluka nkwasà wanyì awu, kutèeka cyanza pa nkwasà wanyì, kwinyika mèsù mu Bible wanyì cyàkàbìdì; mèmè è kutùdika nè mwadi. Mèmè kunyùnguluka nkwasà awu cyàkàbìdì, kuMutàngila cyàkàbìdì. Mèmè kudyàmbidila nè: “Éyì Nzambi, mwòmò amu mùdi Mwoyi wà Cyendèlèlèlè, bwà mulùme yònsò anyi mukàjì yònsò wíkala nè bukitù bwà kutèèKamù dyeyemena dyàbò, nè kuCìitabuuja.” Mwoyi wà Cyendèlèlèlè!

³⁴ Nè Yèyè wàkamba nè: “Kenkètaayi Mifundu, bwalu mu Yòyì amu mmunùdì nwela meeji nè nudi nè Mwoyi wà Cyendèlèlèlè, kàdi Yòyì ayi's ke Yìdì yimfidila Mèmè bujaadiki.” Kenkètaayi Mifundu.

³⁵ “Dìyì dyà Nzambi didi mwèndù ku makàsà ètù,” bwà twètù—bwà twètù kumòna mwà kulombodiibwa, dîbà adi. M'Bukènkè bùdì bùlondà kajila kàdi kàtùlombola ku bucimunyi nè ku bucimunyi.

³⁶ Mpindyewu, kumpàlà kwà wèwè kupeta bucimunyi, kùdì nè cyà kwikala mvità. Nènku kwòkò kakùyì mvità to, kakwèna bucimunyi nànsha bukesè to. Pa nànkù bîvwa bikèngela twètù kwikala nè kusàkidila bwà mvità nè dyediibwa dyà ku cipimu, nènku n'Nzambi ùtùpèèsha mpùngà wa kupeta bucimunyi. Kaa, ekèlekèlè! Aci kacỳèna cìnùvwijakù bîmpè ndambù mpindyewu anyi? Nwamònu anyi? Mvità mmilwè; muntu kampàndà wamba cintu cibi bwèbè wèwè; bubèèdì bùlwa kùdì. Pàmwàpa Nzambi ùkupèèsha mabungama mapeepèlè awu, bwà Wàmòna mwà kukwondopa bwà kukuleeja luse lwèndè, ùkulekela umòna cidiYe ùswa kwamba ku cyòcì aci, mMùkunangè.

³⁷ Bwalu bulonda bwà kale bwà mulami wa mìkòòkò bwàkalondabu mu Yèlusàlèmə mwàmwa, mu malaba à cijila, bwà mulami wa mìkòòkò, ùvwa mwambùlè mù—mùkòòkò. Ke yèyè nè: “Cyùdì muwambwile ncinyi?”

Yèyè nè: “Ùdi nè mukòlò mucibula.”

Yèyè nè: “Mmùfike ku diikala nànkù bìshi; mmudìshinde mu lupòngò anyi?”

Yèyè nè: “To. Mèmè ngudi muwùcibùlè mukòlò.”

³⁸ Yèyè nè: “Mòna's, wèwè's udi mulami wa mìkòòkò wa cikisu, bwà kucibula mukòlò wà mùkòòkò awu.”

39 Yèyè nè: “To. Mémè mvwa muwùngàngè.” Ke yèyè nè: “Ùvwa ùpàmbuka, nè mémè ncìvwa mwà kuwùfikisha ku dincyùka to. Pa nàнку mémè kuwùcibula mukòlò, bwà ngàtamba kuwùtábaleela byà pabwàbì, bwà dībà adi wàmòna mwà kunnanga nè kundonda.”

40 Míngà misangu, Nzambì ùdi nè cyà kutùlekela tucìbukila panshì, ànu kakesè cyanààná, mu bukolè bwà mubidi, bwà kutàmba kutùtábaleela nè ntèmà yà pabwàyi, bwà kutwàmbula pa bibelu Byèndè, kutwàmbishaYè mu cyàdì Cyèndè. Pààkambà ngàngàbukà nè cintu nànsha cìmwè kacyèna mwà kwenjiibwa to; dībà adi Yèyè ùdi ùtùbweja mu cyàdì Cyèndè, wàmba nè: “Wamònu’s, Ndi mukunangè. Nènkusàngàjè.” Nwamònu anyi? Kaa, aci kacyèna cyènzakù nè maalu yikalèku mimpè ndambù anyi? Kaa, Yèyè’s mmunène be! Yèyè’s m’Mulami wa mikòòkò wa ùkèmesha, kī mmwòmò anyi?

41 Kabyèna bikèmesha to pààkambà Davidi nè: “Mukalenge ùdi mulami wanyì. Mémè ncyàkukèngela cintu to.” Nè mùshindù mwinè wùdiYè ùtùlombola lwà ku luseke kwà màyi matalàle; nè ùfùkulula misùùkà yètù; nè mpànza yètù yùwula yipòngolokela nè panshì; nè—nè ùtwèla maanyi kumpàlà kwà mwena lukunà wetù! Ukààdikù kacya mwediibwe maanyi kumpàlà kwà mwena lukunà webè anyi? Ànu bwà kujaadika too nè pàdì lupànza lwèbè lùsàbalala lùpòngolokela nè panshì, udi mumanyè. Mùshindù mwinè wùdibi bilenga bilayà bwà kwikala mwediibwe maanyi mu bwikadi bwà mwena lukunà webè’s wè!

42 Mpindyewu mònaayi, dībà adi, Nzambì wàkangata Mfùmù Nebùkàndànèèsà nè kumuvwija cyamù cyà mudimu mu cyanza Cyèndè. Ne pààkafwà Mfùmù Nebùkàndànèèsà, paanyimà pàà yèyè mumanè kwikala nè. . . Mashinda àkatòloka; nsukì yèndè, bu nyama wa ntambwe, anyi bu masàlà à mikankù; nè nzàdì yà ku minu yèndè bu nzàdì yà mukankù, nè bikwàbò. Ke kukèngelabi bwà Nzambì kumumanyishaYè nè Mfùmù mulelèlè awu ùvwa Nganyi.

43 Paanyimà pàà lufù lwèndè, Belèshààsà, mwikùlwèndè, è kumubìkulayè. Nè, pashìishe, yèyè ùvwa mutàmbe kwikala nè lwonji kutàmba Mfùmù Nebùkàndànèèsà. Nèku dilòlò kampàndà, kuntwaku, bàvwa nè difestò dinène dyà menemene. È kubiikilabò baandùmbùlùlà bààbò—bààbò bônso nè banène bàà bàsàlaayi, bwà difestò dinène dyà mikùùkùkù. Nèku pàvwàbo munkaci mwà kwenza dyòdì difesò dinène dyà mikùùkùkù edi, nè bàvwa...bayè, nè babiikidìshe bwà kupàtula, nè kwangatabò mpànza, mpànza yà cijila yà Nzambì; ànu bwà kwelulwila Nzambì, nè kunwà mvinyò bwà tuunzambì twàbò atu, bànwà maalà bàtuucishangana ngalaasa, mu mpànza yà Mukalenge ayi.

44 Mpindyewu, muntu mmwanyìshiibwe bwà kwenza lwendu lwà ntàntà bule kampàndà, kàdì kùdì mushonyi wà mukàlu

pankaci pàà Mwoyi nè lufù. Kwéna nè cyà kuwùsambukakù to. Nwamònu anyi? Udi mwà kutùngunuka nè dikùtakana dyèbè dikesè adi bwà katanci, kàdi mbitàmbe bwímpè wêwè kumanya mwaba wùdì mulongo awu wùsanganyiibwa. Mukalenge ùkaadikù kacyà mukukenkète pa cintu kanà cyònsò eci anyi? Yèyè ùdì ùtùkenketa, bònsò bwètù, ùkòka myonjì, wàmba nè: “Byakumbanyi mpindyewu.” Dìbà adi mbitàmbe bwímpè bwà wêwè kukenketa cyùdì munkaci mwà kwenza, kwambwila pa dìbà adi mene, pawikalà wenda wela bidya mutàngile ku mushonyi awu.

⁴⁵ Nè dilòlò adi, dìbà dyàkakòkà Nzambi myonjì ya dimwimanyika naayi, kàdi yèyè kàvwa mwà kutèeleja nànsha. Yèyè kutùngunuka nè kupweka nè kupàtwishayè mpànza ya Mukalenge, è kutwàdija kunwìnamù mvinyò, nè kunwà kuyituutakaja bwà kaanzambi kààbò aku. Pashìishe kulwakù cyanza cìfùmina mu Dyulu, è kufùndaci ku cimanu nè: “MENE, MENE, TEKEL, UPHARSIN.” Mbwenà kwamba nè: “Wêwè udi mwediibwè ku cipimu, kàdi mbakusangàne kùyì bujitu nànsha.” Muntu nànsha umwe kàvwakù mwà kucyùmvwija to. Cìvwa myakulu myenyi.

⁴⁶ Kàdi kùvwa muntu mwaba awu, uvwa nè dipà dyà dyandamuna, Danyèlè, ke kupwekayè è kwandamuna nè kwambila mfùmù cìvwa mwà kwenzeka. Nènkù, mwaba awu, Nzambi wàkabùtula ditùnga adi, Baabùlòonà.

⁴⁷ Pàvwà, Danyèlè, bu mùvwàyemù, wàkamòna bikèènà-kumòna binène, nè kufùndayè bwà bwalu bwàbò, bwà disàmbiibwa dinène ditùdì naadi leelù ewu edi, bamanyè, nè ditèèkìlbwe mu bulongàme, ndekeelu wa bukalenge bwà bàà Bisàmbà byà bendè.

⁴⁸ Mònaayi mùdìbi bipwàngàne. Cìseemejaayi pabwìpì mpindyewu. Yèyè wàkamòna, dyàmbedi, cimfwànyì aci ciimàne mu budimi, pàdiye ùmvwija cìlòòtà cyà mfùmù.

⁴⁹ Ùvwa muntu wa nyumà. Wàkalòòta bilòòtà, kumòna bikèènà-kumòna, ùmvwija bilòòtà. Nzambi ùvwa nendè, nè muntu yònsò ùvwa mumanyè aci, yèyè pèndè.

⁵⁰ Nènkù pààkamònàye cìkèènà-kumòna aci, mutù wà ngòlò awu, nè cyàdì cyà cyamù cyà argent, nè bibelu byà cyamù cyà mitakù, nè makàsà à cyamù cìfìke, mònaayi, bukalenge nè bukalenge bwònsò bùdì bùtàmbe kwenda kukola. Bukalenge bwà Mfùmù Nebùkàndànèèsà bùvwa mutù wà ngòlò. Yèyè wàkacyùmvwija, kumwambila ànu menemene mùvwà makalenge awu mwà kulondangana too nè ku ndekeelu. Pashìishe mònaayi, kuumukila ku ngòlò, ngudi mutàmbe kunefuka, argent ke udi ulondela, pashìishe cyamù cyà mitakù cìlonda, pashìishe cìfìke cìlondela; bitàmbe kuuma, bitàmbe kuuma, citàmbe kukwàta mashika, ntàntà mule mutàmbe!

⁵¹ Mònaayi, pashiishe, munkaci mwà byònsò abi, Danyèlè wàkatàngila cimfwànyì too nè pààkatùdiibwa Dibwe ku mukùnà, divwà ditùuka kabìyì ku byanza byà muntu to. Dyàkabùnguluka kubwela mu lupìngù nè kulùzaaza, nè kulwènzà bu blé udiibò bàshipula panshi mu muvù wà luuya lukolè. “Nè Dibwe dyàkadyunda è kushààla mukùnà munène wàkabwikila buloba bujimà nè mbù.” Aci cìvwa n’Dilwa dyà Mukalenge Yesù, didi pabwìpì mpindyewu edi.

⁵² Kutùngunukayè. Pàvwàye wènda ùpweka ku musùlù, dīngà ditùkù, wàkabwela mu nyumà nè kumònayè cìkèèná-kumòna. Bààbùngì bàà kùdìbo bàvwa nendè, kabààkamòna cìkèèná-kumòna aci to, bwalu cyàkafidiibwa ànu kùdì Danyèlè. Nudi nucimòna anyi?

⁵³ Muntu kampàndà ùdi mwà kwimana ànu ku luseke lwèbè aku, nè kumòna bintu byùdì kùyikù mwà kumòna to, nànsha bwà kusùngila mwoyi wèbè. Ncyà bushùwà. Muntu kampàndà wàkamba nè: “Mémè ncyèna ngiitabuuja aci to. Kacya ncitukù mwànji kumòna cintu nànsha cìmwè to.” Bwalu kacìvwa cilongolwela dyèbè dimòna to.

⁵⁴ Aba bààkayà nè Pòlò abu, pààkuumushiibwà Pòlò pa kàbalù kèndè nè kukèngelabi bwà kumatayè mu buloba, nè kuvwàndakana, mutùdì mwà kwamba’s, mu bitoci, muntu nànsha umwe wa kùdìbo kààkatèèleja Dìyì adi anyi kààkamòna cìkèèná-kumòna aci to, Pòlò ngwàkaCimòna.

⁵⁵ Nànsha umwe wa kùdìbo kààkamòna mùtootò wàkakòsololà...nzùbu yònsò wa dijoojela awu to, ànu beena meeji.

⁵⁶ Bintu byàbùngì, mùshindù awu, Nzambì mmùlongòlòle bwà bantu kampàndà kumònabò, kàdi bakwàbò kabàyikù mwà kumòna to. Kaa, ndi munangè aci’s wè! Pàdì Nzambì, mu lungènyi Lwèndè lwà kalùyì mikàlù alu, mudyànjlè-kulongolola, anyi mudyànjlà kulongolola, bwà bintu kampàndà kwenzekabi, mbifwànyine kwenzekela muntu udi musòmbe ku luseke lwèbè awu, kàdi kùyì mumanyè kantu nànsha kàmwè pa bwalu abu to.

⁵⁷ Tàngilàayi ku Dotàna, pàvwà Elishà ùsanganyiiibwa ku Dotàna kwàka nè bònsò bàvwa banyùngulukilekù kùdì—kùdì beenyi bàvwa balwè, cilwilu cyà beena Suuliyà, bàkèba Elishà mupròfètà awu, bwalu, bààkabanga kujandula nè, musangu wònsò wùvwà beena Suuliyà mwà kulwa kùdì Izàlèèlà bwà kwenza mvità, mòna’s, beena Izàlèèlà’s bàvwa bafwànyine kwikala babeelèle lwàci.

⁵⁸ Ke mfùmù wa Suuliyà kubàbìikilayè, kwambayè nè: “Mpindyewu, anji indilà kakesè. Nganyì udi ku cyètù, nè nganyì udi ku cyà Izàlèèlà?” Yèyè nè: “Muntu kampàndà mu musùmbà wànyì emu mmutentekedi udi uya kambila Izàlèèlà

mwaba wutùdi tukabwelela, bwalu bôbô bàdi ànu mwaba awu batwindilè.”

⁵⁹ Nènku ke muntu kampàndà uvwa nè ndambù wa maalu à nyumà mu yèyè, yèyè nè: “To, taatù wanyì, kàdi m’upròfetà Elishà, bwalu yèyè mmumanyè mu nzùbu wendè wa bulààlù ciwikalà wèwè nè cyà kwenza mu ditentemuka dyèbè dyàlondà.” Amen.

⁶⁰ Kaa, pààbangà makolè à tupwishipwishi kunyùkusha, ndi nè disànkà dyàbùngi dyà mùdi Diyì dyà Nzambi nditwàmbila kwà kuya. Nyeemènà ku Lubwebwe, Kilistò Yesù! Muntu yònsò udi mu Lwòlò amu mmukùbiibwe nè ùdi mu dikùbiibwa. Kakwèna cintu nànsha cimwè cidi mwà kukwenzela bibi to. Kakwèna bômbè bwà mushindà nànsha bùmwe, kakwèna bwà cobalt nànsha bùmwe, anyi cikampàndà cikwàbò nànsha cimwè, cidi mwà kulenga bakùbiibwe bàà Nzambi nànsha; bàdi bakùbiibwe, mu dikùbiibwa, bèle lwongò. Ditèkemena kaayi dyà dikèmesha ditùdi naadi mu Kilistò Yesù’s wè!

⁶¹ Mònaayi, kùvwa muntu uvwa nendè. Musadidi wendè, nsongààlùmè wa nyumà, ùvwa ùpòngolwela màyi ku byanza byà mupròfetà awu, mmwànzù munène ùvwaye naawù. Kàdi pààkamònàye cilwilu cyà—cyà beena Suuliyà mu nyùngulukilu mwònsò mwà Dotàna amu, cimuciincimike yònsò, kwambayè nè: “Taatù wanyì, tàngilà kwàka! Musùmbà munène kaayipu’s wè! Mòna’s, twètù’s tudi banyùngulukila!”

⁶² Mpindyewu, aci’s ncyà mu bufùki emu díbà didi maalu ónsò àmwèka ènda bibi, bàkufunkuna munu, bàmba *bikampàndà* nè *bikansanga*, nè ngàngàbukà wàmba nè kwèna mwà kuumvwa bìmpè to, nè bikwàbò, aci’s cidi ànu cintu cyà mu bufùki emu bwà wèwè kwela meeji nè: “Kaa, ekèlekèle, eci’s ke ndekeelu!”

⁶³ Kàdi Elishà wàkamba nè: “Bàdi neetù mbatàmbe bàdibo naabù ku bùngi.”

⁶⁴ Mpindyewu, nudi mwà kudifwànyikijila mùvwà mupròfetà awu, anyi, Gehàzi awu mumvwè, musadidi awu, yèyè kumutàngila, kwamba nè: “Mòna’s, ncyèna mmòna muntu nànsha umwe to.”

Yèyè nè: “Nzambi, kàngulàku mèsù à nsongààlùmè.”

⁶⁵ Nènku Nzambi mmwenzè ànu wènza cintu kampàndà (S’ki cyòci eci. Cyùmvwàayi’s.), pààkakàngulà Nzambi lumònò lwèndè lwà nyumà, mu nyùngulukilu mwònsò wa mupròfetà awu mùvwà màkalù à mvità à Kapyà nè Banjèlò bàà Kapyà. Mòna’s, yèyè wàkamòna... Mòna’s, màkalù à mvità à Kapyà àvwa matàmbe cilwilu cyà beena Suuliyà aci ku bùngi, ku binunu nè binunu. Mikùnà yivwa yilàkuka Kapyà, Banjèlò bàà Kapyà, tubalù twà Kapyà, màkalù à mvità à Kapyà.

⁶⁶ Nè Bible mmwambè nè: “Banjèlò bàà Nzambi bàdi bààsa citùùdilu banyùngulùkile aba bàdi bàMuciina.”

⁶⁷ Ànu byà mwomùmwe dilòlòlò edi! Ndi ndikonka cidi cifwànyine kwenzeka bu muntu kaaba aka, dilòlòlò edi, mwikale nè bukolè bwà kukulenga kwisù, nè kwamba nè: “Tàngilà, bàdi biimàne banyùngùlùkile tabernacle ewu dilòlòlò edi!” Udi mufwànyine kushààla cidimba mwaba ewu matùkù èbè ònsò à mwoyi. Bushùwà’s. Èyowà’s, mukalenge.

⁶⁸ Míngà misangu kwènà mwà kuCimòna nè mèsù èbè à mu bufùki emu to, kàdi udi mwà kuumvwa disàkiibwa dyàCì, Cintu kampàndà pabwìpì apu. Cyumvwilu ciisambòmbò cidi cileejà nè Cintu kampàndà cidi pabwìpì apu.

⁶⁹ MutàngilaaYi, mu dindà emu, munkaci mwà kukàngula maci à mpudimaci, ùfikisha bikalàbà bìdì bicìbwila panshi kùdì tunèkè ku dyenda mwaba ewu, bu nè kakùvwa cintu nànsha cimwè cibì kùdibo to. Ncinyi aci? Ncyumvwilu cyà munda, anyi, ndi muswè kwamba nè, cyumvwilu, cyumvwilu ciisambòmbò cidi cimanyè aci, nyumà awu, bwà nè Cintu kampàndà cidi pabwìpì. Ikàlà nè diitabuuja mu Nzambi!

⁷⁰ Mpindyewu, kabàvwa, yèyè kàvwa mumòne Aci, dyàmbedi to. Kàdi, pàmwàpa Elishà kàvwa muCimòne to, kàdi wàkalòmba bwà mèsù à nsongaàlùmè awu kuCimònawù, kàdi Elishà ùvwa mumanyè nè Bòbò abu bàvwapù. Amen.

Toomààsè, musangu kampàndà, wàkamba nè: “Ndekèlèku ntentekè byanza byànyì mu lubadi Lwèndè.”

⁷¹ Yesù wàkamba nè: “Mpindyewu wàmònu nè witàbùùjì. Difutu dyà aba bàdi biitabuuja kabàyi bamònè, kàdi biitabuuja nditàmbe bunène.” Ke twètù abu dilòlòlò edi, bwà ewu yònsò udi muswè kwitabuuja, kàyì mumòne to.

⁷² Nèku mònaayi nè, pashìishe Elishà kupàtukayè mwaba wùvwà bwalu ebu bwenzèke awu, ke yèyè kubàmbila... Dyàmbedi, kupàtukayè kuntwaku, nè Bible mmwambè nè: “Yèyè wàkabàtuuta bufofo.” Mpofo, nè kupàtukayè ànu buludi mutàngile kùvwàbo aku. Muntu nè muntu ùvwa nè lumònu lwà mèsù lupwàngàne, ku dyànyì pàanyì dimanya, kàdi Mufundu mmwambè nè: “Bàvwa mpofo.”

⁷³ Mulùmýànà mukesè, kùkaadi ndambù wa malòlòlò, kungambilayè nè: “Wèwè ní udi muntu wa Nzambi, mvwijààku mpofo.”

Mèmè nè: “Wèwè’s ukàadi mumanè kwikala mpofo.” Nwamònu anyì? Nwamònu anyì? Ukàadi mumanè kwikala mpofo!

⁷⁴ Mònaayi, ke kuyayè kuntwaku, ku mwaba wùvwà bwalu abu búsanganyibwa, kùvwà cintu cinène aci cisanganyibwa, ke yèyè nè: “Nudi nukèba Elishà anyì?”

Bòbò nè: “Èyowà’s.”

⁷⁵ Yèyè nè: “Lwàyaayi, ndondàayi, nènkanùfikishè too nè kudiye aku.” Elishà kubàmbilayè nànu awu. Bàvwa mpofo

ku cinyi? Bàvwa mpofo ku bulelèlè bwà nè yêyè awu ùvwa mupròfètà wa Nzambi abu, bàvwa mpofo ku cyôci aci. Nènku wàkabalombola buludi too nè mu butèyi, cyàkàbidì. Yêyè nè: “Lwâyaaku, mèmè nènùnùleejè Elishà,” pèndè mwikàle ng’Elishà wàkaya naabò kuntwaku awu.

⁷⁶ Kàdi mbenzè ànu bàkènzakana, kusanganabò nè bàvwa babànyùngùlùkila, mfùmù kwambayè nè: “Taatu wanyi, ndi nè cyà kubàtuuta anyi?”

⁷⁷ Yêyè nè: “Udikù mwà kwangata mwena bùlokò bwà kumutuuta anyi?” Yêyè nè: “Bàpèèshèku cintu kampàndà cyà kudyà, kàdi ùbaalùjè ku ditùngà dyàbò.”

⁷⁸ Mùshindù awu ke wà kujikija mvità. Kî mmwômò anyi? Cyà bushùwà’s. Kaa, ekelekèlè! Bu twètù ànu mwà kwangata diyì dikùlù adi, leelù ewu, bwà kudiisha mwena lukunà webè. “Enzèlè aba bàdì bàkwenzela bibì bîmpè.” Amen.

⁷⁹ Mwaba awu, mpindyewu, bufofo’s.

⁸⁰ Mpindyewu, Elishà, anyi ndi njinga kwamba nè, kî ng’Elishà to mpindyewu, kàdi n’Danyèlè, Danyèlè wàkadyànjila kumòna, yêyè ùvwa mupròfètà, wàkamòna dilwa dyà Mukalenge, wàkamòna cikondo cyà nshìikidilu cilwa, wàkamòna bàà Bisàmbà byà bendè bààbanga.

⁸¹ Nènku bu nwènù mwà kumòna, bàà Bisàmbà byà bendè bààkabanga nè—nè dikuukwila dyà lupingù. Bàvwa bàkuukwila lupingù lunène lushikika mu budimi, lupingù lwà muntu, Ngèèla meeji, Danyèlè, yêyè mwine. Bwalu, Mfùmù Nebùkàndànèèsà ùkaavwa mumwinyike nè Belèshààsà, cìvwà ciikàle nzambi wendè, nè kubangayè kukuukwila cimfwànyì cyà muntu mwakàne, muntu wa cijila. Kàdi Danyèlè wàkabènga kucyènza, ke mwàkenza—ke mwàkenza bânà bàà beena Ebèlù, baa Shandàlàkà, Meeshàkà, nè Abèdènègò.

⁸² Ke mùshindù wàkabwelabumù, nè bwàkapishibwa, mutù wà ngòlò awu wàkatwàdija mu dikuukwila dyà cimfwànyì, benzèjiibwe bwà kucyènza, nè kujikilaci mu Cyanza citàmbe-mfùkilu cìfùnda mwakulu mutàmbe-mfùkilu, ùvwà ànu dyumvwa ditàmbe-mfùkilu mwà kuumvwa. Amen.

⁸³ Mùshindù awu ke wàkatwàdija bukalenge bwà bàà Bisàmbà byà bendè, nè bwòbù nebùjikè mùshindù wùm wèwùm wè awu, ncyà bushùwà, ku byenzedi bitàmbe-mfùkilu, dyumvwija ditàmbe-mfùkilu. Nudi bamanyè cìndì ngàmba aci’s. Dikwàtà dyà mudimu dyà citàmbe-mfùkilu, kaa, mùshindù mwine wùdibi bilenga bilayà’s wè! Kanwènaayikù nè disànka, dilòlò edi anyi, munùdì nwitabuuja citàmbe-mfùkilu anyi? Èyowà.

⁸⁴ Mpindyewu, pashiishe, paanyimà pàà bikèènà-kumòna ebi, Yêyè wàkamuleeja ànu menemene mwaba wùvwà matunga nè cyà kwikala miimànyine awu. Yêyè wàkamuleeja mùshindù wùvwà bidimu byàbùngì bishààdile beena Yudà.

Yêyè nè: “Maasiyà neàlwe. Neámbe cipròfetà mu mbingu makùmi mwandamutekète, cidi ciikàle bidimu bisàtù nè citùpà cìmwè. Munkaci mwàbì, Yêyè neùmushiibwè, ciinè aci mbidimu mwandamutekète. Mbingu makùmi mwandamutekète mmikòsela cisàmbà cyèbè; bidimu mwandamutekète byà cipròfetà kùdì beena Yudà.” Yêyè nè: “Nè Maasiyà, Mfùmù awu, neàlwe nè kwamba cipròfetà, munkaci mwa mbingu mwandamutekète, matùkù mwandamutekète, Yêyè neùmushiibwè. Mu cinyangu, cidi cìfla kabùtù, necishaalè pa kaaaba kààcì. Nè bôbò nebàdyatakajè bimanu byà Yelusàlèrà, bàà Bisàmbà bya bendè abu, bwà cikondo cìmwè, cikondo, nè citùpà cyà cikondo.”

⁸⁵ Mpindyewu, pààkalwà Maasiyà, Yesù, Wàkayiisha ànu menemene bidimu bisàtù nè citùpà, nè wàkuumushiibwa, bwà Mulàmbù. Mulàmbù mwenzeja wà bwàcyàbwàcyà wàkuumushiibwa. Nè kabùtù, cinyangu cidi cìfla kabùtù aci, mosquée wà Omar, wùvwa mwimàne leelù ewu pa mwaba wà ntempèlù wa cijila. Mosquée wà Omar mmwimàne ànu menemene mwaba wùvwa ntempèlù ùsanganyiiibwa awu.

⁸⁶ Ke kwambayè, nè: “Bàvwa mwà kudyatakaja bimanu byà Yelusàlèrà ku makàsà, pamutù pàà Yelusàlèrà, too nè pààjikà cipungu cyà bàà Bisàmbà byà bendè. Kàdi, ku ndekeelu kwà bàà Bisàmbà byà bendè, nekwikalè ànu bidimu bisàtù nè citùpà, kàbìdì, bwà beena Yudà.”

⁸⁷ Mpindyewu mōnaayi cìmwè cyà ku bintu bìdì bitàmbe kwikala byà bìkòka ntèmà byà bwalu-bulonda bwà cipròfetà.

⁸⁸ Ncyèna ngàmba mündi mumanyè cipròfetà cyà Bible to. Kàdi eci's cidi ànu bu kubala kwà cibèjibeji; citòòke tòò. Nènku, citùdì tubala Apa eci, tudi bamanyè nè m'Bulelèlè.

⁸⁹ Mōnaayi nè, bidimu binunu bibìdì, èyowà, binunu bibìdì nè nkàmà yìtaanu, beena Yudà mbatangàlajìibwe mu ditùngà nè ditùngà dyònsò mwínshì mwà Dyulu. Ànu mwàkapapishà Nzambì mwoyi wà Pàlò amu, pàvwàYe ùbààluja apu, Wàkapapisha mwoyi wà Hitler, mwoyi wà Mussolini, nè bikwàbò, mu mùshindù wà nè Wàkabààluja ku Pàlèstinà. Bààlukila, bàakabenza ditùnga kàbìdì. Nènku mu matùkù àsambòmbò à Ngondo wa Lumùngùlù, cidimu cyà 1947, dibèndela dyà beena Yudà dyàkabàndishiibwa mu Izalèlèlè, bwà musangu wàkumpàlà paanyimà pàà bidimu binunu bibìdì nè nkàmà itaanu. Dibèndelà dyà kale menemene pa buloba dyàkabàndishiibwa kuulu bwà musangu wà kumpàlà mu bidimu binunu bibìdì nè nkàmà yìtaanu. Nè Yêyè wàkamba, mu matùkù à ndekeelu nè: “Ùvwa mwà kujuula cimanyinu pa Yelusàlèrà,” bileeja nè cikondo cikaadi pabwìpì.

⁹⁰ Kàdi mōnaayi nè, mwab'ewu ànu àbìdì àdì panshì aa, mvwa mumòne mukàbà wà mèyì wà cipròfetà mwediibwe wùfùmina kuntwaku. Nè bàdì bàlwa nè beena Yudà abu, ku

binunu, ku ndèkè. Nukààdi bacimòne mu cibèjibeji, nè bikwàbò. Bikàndàkàndà byà *Look* nè *Life* mbicipātūle. Binunu byà beena Yūdà munkacì mwà kwalukila! Ke kubàkonkabò, bàmba nè: “Cinùdì nwalukidila ncinyi?” Banunu, bacibùkile panshi, babambùle paanyimà, kùdì bansongà bààbò. Bòbò nè: “Nudi nwalukila mu buloba bwènù bwà kufwà anyi?”

Bôbò nè: “To. Tudi twalukila bwà kumòna Maasiyà.”

⁹¹ Yesù wàkamba nè: “Panwàmònà mucì wà mfigì awu wèla ntòngà, nè micì mikwàbò yònsò yèla ntòngà, nwamanyaayi nè cikondo cikaadi pabwìpì, anyì movù wà bintu bitòloka wùkaadi pabwìpì, movù wà luuyà. Pa nànkù, panùdi numòna bintu ebi byènzeka, bàndishàayi mitù yènú, bupikudi bwènú bùkaadi bùseemena pabwìpì.”

⁹² Dilòòlò edi, pàdì buloba ebu bunsùnsulula kùdì communisme! Kaa, mvwa nyiikilangana nè muntu kampàndà kwènjì katanci, pa. . .umwe wa ku bàdì bàtàmbe kushikuluja dimanya, ngèèla meeji, bandiku pàànyì mumanyè. Nè pààkambàye bintu bivwà bitàngila ditùnga edi, nè communisme, mbifwànyine kukututakaja mpòmbombò yà binù, ncyà bushùwà, mshindù wùdibu bunsùnsulula's. Kakùcyenà kàbìdì cintu cicolàkàne to, nè mu ditùngà dyètù mene emu, mbikolè.

⁹³ Kùdi cintu ànu cìmwèpelè cìkolè cìndìku mumanyè cììmanà, aci's n'Lubwebwe, Yesù Kilistò. Tudi twakidila bukalenge bùdi kabùyì mwà kunyungishiibwa nànsha. Nè mu ditùkù edì mùdì bikwàbò byònsò munkaci mwà kudìshìnda, tudi nè cishìmikidi cìkolè, Mukalenge Yesù Kilistò. BwelàayiMù, balundà bàanyi. Ncisokomenu mu cikondo cyà cipeepèlè cìkolè. Cintu kaayi cyà cìkèmesha's wè!

Wàkamòna byônsò ebi byènzeka.

94 Tudi tumòna beena Yuda mpindyewu. Bible mmwambè nè Yelusàlèma, nè ùvwa mwà kwela bilòngò bu cilòngò cyà rose. Nè mùshindù mene wùdìbo bapandè mikìdì yà màyi mu cipèèlà mu bulaba abu's! Nè bàdì kàbìdì. . . Muprofeta wàkaakula, nè kwamba nè: “Ditùkù adi,” nè, “mâyi neáfuminè ku nord.” Kamùvwa màyi mu cikondo aci nànsha, kamùvwa mishimi yà màyi mu cikondo aci nànsha. Kàdì mu ndambù wa bidimu bishààle ebi, kùdì mushimi wà ùfùkuka, nè ùdì ùmyamina màyi mu bibandabanda. Nè bàdì munkaci mwà kupanda mikidì yà màyi; ncìmwè cyà ku bipaapu binène byà madimi, bwà bunène bwàci, bwà buloba bujimà.

⁹⁵ Nè mishìndà minène yònsò eyi mu Mbù Mufwè. Kùdi mishìndà búngì bukùmbàne yìdì yìsanganyiibwa mwínshì mwàwù amu, yìvwà bubanjì bwònsò bwà pa buloba kabùyi mwà kusùmba to; mishìndà, uranium nè bintu bikwàbò byònsò, ànu mwínshì menemene mwà Mbù Mufwè amu, wudi mpidyewu ewu wa Izàlèlèlà.

96 “Muci wà mfigì ùdi wèla ntòngà yàwù.” Kaciyi ànu aci to, kàdi micì mikwàbò yidi yèla ntòngà yàwù. Ba-communistes bàdi bèèla ntòngà. Mufwilakanyi nè Kilistò ùdi wèla ntòngà.

97 Nè Èkèleeziyà wa Nzambi ùdi wèla ntòngà. Ùdi wèla cyàkàbìdi bilòngò mu bukolè Bwèndè. Mukùmbi wà ngazamà wàkadyà cyàwù citùpà, mukùmbi wà yelèkè wàkadyà cyèndè citùpà, mukùmbi wà yelèkè wàkadyà citùpà cyàwù, mukùmbi wà hazilà wàkadyà cyàwù citùpà, kàdi Nzambi wàkamba nè: “Newìkalè cyàkàbìdi nè mwoyi.” Ùdi wèla ntòngà mpindyewu.

98 Micì yidi yèla ntòngà. Danyèlè wàkadyànjila kucimòna, nè wàkasànka. Mpindyewu, pa diine dībà edi, yèyè kwamba nè: “Nènku pa diine dībà adi . . .” Nshapitā wa 12.

Nè ku cikondo aci Mikàèlè neàjuukè, mfùmù munène udi mwimànyine bānà bàà cisàmbà cyèbè: nènku nekwikalè cikondo cyà ndululu, citù kacya . . . kacya mene ditunga diikalakù to nè ku . . . cikondo aci: nè mu ciinè cikondo aci cisàmbà cyèbè necipikudiibwè, ewu yònsò wikala musangànyiiibwe mufundiiibwe mu mukàndà awu.

99 Kaa, ekèlekèlè! Kwènàku nè disànkà mùdì dīnà dyèbè mu Mukàndà Wèndè anyi? Pàvwāye, Danyèlè, lwà apa, wàkaMumòna: “Wàkalwa kùdi Mukùlùmpile matùkù, Uvwa nè nsukì mitòòkè bu myòsà yà mùkòòkò awu. Ke Yèyè kukàngula Mikàndà. Nè bààkalumbulwishiibwa, muntu yònsò, mu Mikàndà amu,” Cilumbulwidi cinènè cyà Nkwasa Mutòòke.

100 Mpindyewu, Danyèlè mmupèèshiiibwe ditwishiibwa edi ku ndekeelu kwà cipungu cyà bàà Bisàmbà byà bendè. Balàayi . . . panwàlukilà mu meènù, nènku màalabà, balàayi nshapitā wa 11. Nudi mwà kumòna mùdì mfùmù wa ku nord wènda ùpweka, ùdi kàyì cīngà cintu to ànu Russie, ùpweka bwà kucilwisha, bu mùdì mvùnda amu. Nè Mvitā minène yà Hààmàgiidònà neyilwanganyiiibwè kuntwaku mene pabwipi nè biibi byà Yelusàlèmə. Mònaayi. Kaa, ndi munangè eci's!

. . . nè mu ciinè cikondo aci cisàmbà cyèbè necisungidiibwè, yònsò wàkasanganyiiibwa mufundiiibwe mu mukàndà awu, mukàndà wà mwoyi wà Mwānà wa mùkòòkò.

101 “Mikàèlè, mfùmù munène awu, neàjuukè” (cinyi?) “bwà cisàmbà cyèbè.” Èyo.

Nè bààbūngi bàà ku aba bàdi balàale mu lupwishi lwà buloba nebàbiikè (dībà kaayi?) pàdi bikondo ebi byènzeka, nè bàmwè bwà mwoyi wà kashidi, nè bàmwè bwà bundù nè dipeetudiibwa dyà kashidi.

102 Ànu mùdìbi bushùwà nè kùdi Mwoyi wà kashidi, kùdi diya dyà kashidi. Mbilàle ku mùshindù wùdì wenzela Kilistò maalu mu nsòmbelu webè. Wèwè muMunangè, nè mulediiibwe

cyàkàbidi, nè mwikàle nè Nyumà Wendè, udi nè Mwoyi wà kashidi. Wêwè kùyi mwenzè nànkù to, kwèna nè Mwoyi wà kashidi to. Dìna dyèbè dyôdi difùnda mu Mukàndà wà Mwoyi wà Mwànà wa mùkòòkò, udi nè Mwoyi wà kawùyi mwà kufwà to. Dyôdi kadiyi difùndiibweMù to, kwàkwanyishiibwa to.

¹⁰³ Ncinyi aci? Bipròfetà byònsò abi mbyùle; bintu byònsò, ànu too nè ku cikondo eci.

¹⁰⁴ Mutù wà ngòlò mmùmanè kupita, mùvwà Danyèlè mwambè nè ke mwènzekàbi, bukalenge bwà Baabùlòonà.

¹⁰⁵ Bùvwà bùlonda abu, mwàkambàye, bùvwà mwà kwikala bwà beena Medàayi nè beena Peelèsà. Bwàkalonda bukalenge bwà Baabùlòonà.

¹⁰⁶ Nè bàakadishinda, ku (nganyi?) beena Ngelikà, Alexandre Munène awu.

¹⁰⁷ Ke kupònabò, ku (cinyi?) beena Loomò. Kàdi beena Loomò kukòsolokabò, pa buloba bujimà, Loomò wa ku esètè nè wa ku wesètè, mikòlò yìbidi ayi.

¹⁰⁸ Kàdi kwambayè nè cyamù cifiike nè dîma bìvwa pa bânà bàà nkàsà, bânà bàà nkàsà dikùmi, makalenge dikùmi, nè kwambayè nè kabàvwa mwà kusambakana to, nè bàvwa mwà kuselangana munkaci mwàbò, cyena Loomò nè cyena Mishòonyi.

¹⁰⁹ “Nè mu dyôdi ditùkù adi,” pàdi cintu eci ciikàlekù, “pashìshe Dibwe dyàkatùùdiibwa ku mukùnà, kadiyi ditùùla kùdi byanza to, nè kubùngulukadi nè kuzaaza cintu aci tusùnsùkilà.” Nènku Dyàkangata kaaba kàà cimfwànyi aci.

¹¹⁰ Pa nànkù, bânà bèètù, tudì nè ntàtu, dilòlòlò edi. “Mvità, minungànyi yà mvità; dikanka dyà buloba mu myaba mishìilèshìilàngàne; dipampakana dyà cikondo, dikènga munkaci mwà matunga.” Nèidi mfùminakù dyàmwàmwà dyà mbù, kàdi ncyènà mumònekù ditùngà didi kadiyi dyòmba cìkàcìkà to. Kì mbamanyè cìikalà mwà kwenzeka pashìshe to.

¹¹¹ Kàdi katwenàpu nè disàkidila, dilòlòlò edi, bwà mutùdi cyà bushùwà bamanyè cìikalà mwà kwenzeka pashìshe's! Mukalenge Yesù Kilistò neàlwe musangu mwibìdi, mu butùmbi nè bunèmè! Nènku mulùme yònsò anyi mukàji yònsò udi mufùndiibwe mu Mukàndà wà Mwoyi wà Mwànà wa mùkòòkò, neàjuukè nè bananga bèndè, bwà kutwìlangana nè Mukalenge mu mpeepèlè. Kaa, cintu cilenga kaayìpu's wè! Ke bwà cinyi tudì twamba nè:

Ditèkemena dyètù kî ndiibakila pa cìngà cintu to

Ànu pa Mashi à Yesù nè bwakàné;

Pàdi byònsò bìdi binyùngùlùkile musùùkà wànyi bìdi byùmuka,

Yèyè ke ditèkemena dyètù dyònsò nè cisokomenu.

112 “Nè pa diine dībà adi, Mikàèlè neàjuukè, mfùmù munène awu.” Mikàèlè ùvwa Kilistò, mu bushùwà bwà bwalu, Wàkalwangana mvità yà Banjèlò mu Dyulu awu, nè dyabùlù. Sàtaanà nè Mikàèlè kulwanganabò, anyi kulwishanganabò ewu nè mukwàbò, èyowà’s wè.

113 Nènku, mpindyewu: “Nènku pa diinè dībà adi,” mwàkambàye, “bùngì bwònsò bwà bààkasanganyibwa bafùndiibwe mu Mukàndà awu bààkapikudiibwa. Nè aba bàdi benze maalu maakàne . . .” Tàngilàayi eci.

*Nè aba bìikalà—nè aba bìikalà bàà lungènyi
nebàkènkè bu dibalakana dya dyulu; nè bu mùdì . . . nè
aba bààkùdimune bààbùngì kubàtùma ku bwakàne bu
mìtootò bwà kashidi . . .*

114 Ntu ntàngila cyôci aci, mîngà misangu, nènku ngèèla meeji, bânà bèètù. Ntu mpâtuka, mu dîndà. Ntu munangè kujuuka kumpalà kwà dībà. Kanûtukù baswè kujuuka kumpalà kwà dībà anyi?

115 Ndi mvùluka pâmvwà mêmè nè bânà bèètù tusanganyibwa ku mikùnà. Mu dîndà dya bwebwebwe, twipacila ku dībà ìnaayi jaajaaja, tuvwa mwà kujuuka. Tutàngila, mulembèlèlè paanyimà pààpa, nè kùvwa mùtootò wà dîndà. Kwîsù kùtu kùfiika bikolè menemene kumpalà kwà bufùkù kucyàbo.

116 Tudi tumòna mîdimà munkaci mwà kudisanga mpindyewu. Ncinyi aci? M’Bukènkè bwènda bwipata mîdimà. Cîmwè cidi nè cyà kuumuka.

117 Bintu byònsò bìvwà byènda bìlamba panshi butùku bujimà abi, pàdi dībà adi dijuuka, bìdi byàngata cisokomenu pàdi bukènkè bùkenkesha apu. Butùku nè mîdimà. . . Butùku nè bukènkè kabyèna mwà kwikalakù mu nzùbu umweumwe awu to. Anyi kùdi mîdimà anyi kùdi bukènkè. Nè bukènkè bùdi nè bukolè bwàbùngì kutàmba mîdimà.

118 Ke mùdì kàbìdi Kilistò nè bukolè kutàmba beena lukunà bònsò bàà pa buloba.

119 Mpindyewu, tudi bayiile kùdi beena maalu à mamanya; pàdi bukènkè bùbanga kulwa, bùdi bungwija mîdimà. Nè mîdimà yidi yikùngwija cilwilu cyàyi cyònsò, bwà kulwisha bukènkè, kàdi bukènkè bùdi bùcimuna nè bùbànda pamutù.

120 Nè Bible mmwambè, mu matùkù à ndekeelu, nè: “Sàtaanà ùvwa mwà kwenda bu ntambwe udi ukungula.” Yèyè ùdi munkaci mwà kusangisha, leelù ewu, beena lukunà bèndè bwònsò, balundà bèndè bwònsò, beena lukunà bèètù, nè ùbàsangisha pàmwè; bàkùngwila mwînshì mwà mutù munène, cimanyinu cyà nyama wa lwonji, mu bipaapu byà butèndeleeedi, nsangilu wa maèkèleeziyà. Bwònsò munkaci mwà kudisanga nè kudivwija bulongolodi bunène, ànu mùdì bwena Kàtòlikè amu.

¹²¹ Nè makalenge maalàbàle àdi munkaci mwà kudisanga pàmwè, nè àfùmba mutù munène kuntu kwàka, mu bipaapu byà cididi, bìdi bibiikidiibwa nè n'communisme.

¹²² Nè Bukênkè bwà Nzambi bùdi munkaci mwà kutùngunuka. Ncinyi cidi munkaci mwà kwenzeka mu cikondo cìmwècìmwè aci, bwà kucyèza: Èkèleeziyà wa beena Kilistò, Èkèleeziyà wa Nzambi udi nè mwoyi, ùdi munkaci mwà kulaabiibwa; bukolè bùdi bùlwa kùdiYe, Ùdi munkaci mwà kupeta Nyumà Mwîmpè.

¹²³ Cidimu cishàale eci, mu bipaapu byà Èvànjeeliyò mu kaabujimà, kùvwa bantu mùliyò mujimà nè nkàmà yitaanu bakùdimùne mucìma. Cyà citàmbe bunène cìvwà citàmbàkàne pa bulaba bujimà bidimu paanyimà pàà bidimu. Katwèna mu kajila kàbidi to. Tudi babànde mu mùsèsèsù munènè wà àlèluuyàh. Katwèna mu kaacisaasa, kàbidi to. Bantu mùliyò mujimà nkàmà yitaanu bakùdimùne mucìma mu milongo yà Èvànjeeliyò mu kaabujimà, cidimu cishàale eci, kutàmbe beena Kàtòlikè nè bikwàbò byònsò. Kaa, ekèlekèle!

¹²⁴ Ncinyi aci? Bukênkè bùdi munkaci mwà kudisanga. Masangisha manène à dyondopa mmányùngùlùke kabùlùngà-buloba. Àlèluuyàh! Lwà mu, mwàmwa mu Formosa, tùmpanyè twà dyondopa tùdi tùtùngunuka. Lwà mu Japon mwàmwa, tùmpanyè twà dyondopa tùdi munkaci mwà kwenzeka. Lwà mu myaba yà mashika yà ku nord, tùmpanyè twà dyondopa tùdi munkaci mwà kwenzeka. Pa buloba bujimà, tùmpanyè twà dyondopa's! Àlèluuyàh! Bantu bàdi munkaci mwà kupeta Nyumà Mwîmpè, bàà myaba yònsò. Tudi ku cikondo cyà nshìikidilu.

¹²⁵ Cidi cyèza cinyi? Dìbà adi dyabùlù ùdi wàmba nè: "Mpindyewu ke dyànyì dìbà ndyòdi edi." Yèyè ùdi ùsangisha makolè èndè awu. Nsangilu wa maèkèleeziyà ùteeta bwà kuciimanyika, wàmba nè: "Bàdi ànu musùmbà wà tushèètè twà mutooyi cyanaàna. Kakwèna cintu nànsha cìmwè kùdibo to. Byònsò ndikolesha dyà maalu. Kakùtukù cintu pààci nè nkukwàta mudimu mu Citàmbe-mfùkilu to."

¹²⁶ Nènku pa dìbà dimwèdimwè adi, mutù wà Àmèrikè... nsangilu wa maalu à dyondopangana ùdi ùfùnda kaabwalu mu cibèjibeji, wàmba nè: "Muntu nànsha umwe kèna nè bukenji bwà kubwela mu cibambalu cyà babèedi, bwà kwenzela bantu mudimu, udi kàyì wìtabuuja Nzambi wa Bukolè bwònsò nè ùMwitaba bu Mukwàcishi wendè to." Cikàndàkàndà cyà *Le Héraut Chrétien*, pàvwàci munkaci mwà kwela baangàngàbukà nkonko ngondo mushàale ewu, bààkafùnda kaabwalu kampàndà kàmvwà nciyì mwà kufùnda, mèmè mwinè to, bu mèmè mwà kuteeta bwà kuditàmbisha bwàci. Ncinyi aci? Munkaci mwà bintu byònsò, Nzambi neàfikishè beena lukunà Bèndè bwà kuflabò bujaadiki bwà butùmbi Bwèndè. Èyowà's,

mukalenge. Ngàngàbukà kwamba nè: “Tudi mwà kufila ànu dikwàcisha, kàdi Nzambi kí mmwondapi.”

Mémè nè: “Bantu banène abu bàdi ànu munkaci mwà kujandula citùvwà twètù musùmbà wa bacimbàkàne aba bamanyè kwònsò eku.” Ncya bushùwà.

¹²⁷ Dìmwè dyà ku matùkù à butùmbi aa, nenùjandulè nè musùmbà wà Bukolè ewu, wùdì wùshintulula bandumbà bàshààla bainàbànza, nè baakanwàyi bàshààla bantu bàkàlàngà nè beena Kilistò, ke Bukolè bwikalà mwà kubàbàndisha kubuumusha pa buloba ebu nè kuya naabò Kumbèlu mu Dyambwibwa, mu Butùmbi. Dìbà didi mwà kwikala dimanè kupita bikolè; dìbà didi mwà kwikala dimanè kupita bikolè bwà bààbùngì.

¹²⁸ “Mu ditùku adi, Mikàelè neimanè bwà bantu.” Yèyè kèna wìmana bwà matùnga to. Yèyè ùdi wìmana bwà bantu. “Nè bààbùngì bàà ku aba bàdi balààle mu lupwishi lwà buloba, bàmwè nebàbiikè bwà bundù bwà kashidi nè dipeetudiibwa dyà kashidi. Kàdi aba biikalà bàà lungènyi nè bakùdimùne bààbùngì ku bwakàne, nebàkènkè bu mìtootò kashidi nè kashidi.” Àlèluuyàh!

Ntentà anyi kabutabuta kàà nzùbu, mbwà cinyi bùndi mwà kutàcishila meeji?

Bàdi munkaci mwà kungiibakila nzùbu wa bukalenge mwalàbàle Mwàmwa! (Nwàlwa kummòna dīngà ditùkù!)

¹²⁹ Ncinyi aci? Nkàatu mupàtùke nè mutàngile mùtootò munène wà mu dindà awu, pàdiwu ùbanga kutentemuka mwàmwa. Mùtootò wà mu dindà wùdi wàmba cinyi? Mùtootò wà mu dindà wùdi ànu wùleeja bukènkè bwà kumutù kwà dìbà dilwalwà. Ncya bushùwà anyi? Mùtootò wà mu dindà, cidi cyenzè nè wikalè wùbàlakana bikolè (nudi bamanyè nè mbwà cinyi anyi?), dìbà nditàmbe kuseemena pabwìpi menemene naawù. Ndicìncimikiibwa. Nè mùtootò wà mu dindà wùdi wùsekelela dilwa dyà dìbà.

¹³⁰ Bìmpè, nwènu mìtootò yà dindà, dìbà dyàkùmbanyi dyà kuMusekelela pàdiYe ùlwa! Kènkàayi, nwènu mìtootò yà dindà! Juukàayi nè bwebwebwe! Ùdi wàmba nè: “Mwànà awu neikalè kaaba aka ànu àbìdì àdi panshì aa!”

¹³¹ Patùdì tutàngila nè tumòna mùtootò wà mu dindà awu, pàdiwu wùbàlakana mu maulu apa, cidi cyùmvwija nè dìbà nedikenkeshè mu mutanci mukesè emu.

¹³² Nènkù patùdì tumòna Mìtootò yà dindà yà Nzambi, yijuuka nè yikenka bwà butùmbi bwà dibìikà dyà ku lufù dyà Yesù Kilistò, bidi bileeja nè Mutàmba kutùmbuka awu ùkaadi pabwìpi. Makènkà àdi munkaci mwà kukùngwila, kàdi Mùtootò wà dindà ùdi wèla lubilà nè: “Shààla mukwàte! Kakwàkunènga butùku kabùyì bucyè to.” Shààla mukwàte! Kakwàkunènga

butùku kabùyì bucyè to. Tùngùnuka wêwè ànu nè kushààla mukwàte. Ànu mùvwà Mwanèètù wa bakàji Murphy nè bakwàbò abu nè ciibidilu cyà kwimba nè: “Shààla wêwè ànu mukwàte bikolè; bukènkè bwà ditùku bùkaadi pa kulwa.” Shààlaayi bakwàtakù! Mitootò yà dindà yidi yikenka bwà bàà pa buloba mpindyewu, miikàle yikenkesha buloba, pabwìpi menemene nè mîdimà minene, nè dikubakuba dinène dyà difùma mu Dyulu, Dilwa dyà Mukalenge.

Tèelejàayi nè ntèmà mpindyewu. Mpindyewu yèyè kwamba...

133 Mèmè kutàngila mùtootò wa dindà, ke mèmè kudyàmbidila nè: “Kaa, mùtootò wà dindà!”

134 Mèmè kutàngila panshi dîngà ditùkù, pâmvwà mwimàne mwaba awu, mèmè nè Mwanèètù Wood, yèyè ùcivwa ànu ùteemeshelakù kapyà aku, nènku tuvwa nè cyà kulongolola didyà dyà dindà, ke mèmè kukùdimuka è kutàngila mùtootò wà mu dindà. Mèmè kupàtuka kwendela mu meetu à cedre awu; nè mpeepèlè yènda yèla tushibà mwînshì mwà micì yà pins amu. Mèmè kwimanamù. Mvwa mûmvwè bîmpè, mwikàle ngèyela lupeepèlè, lwîmpè lwà mu dindà alu; kuulu kùvwà kwènzè bu nèjè ùswa kulòka, nèjè wabûngì. Pwekà ku kasùlù aku, ùsuna mbekeci wa mâyi, àdì àkwàta dibwe kumpàlà kwà wêwè kujúuka.

135 Mwimàne kuulu kuntwaku, mwelè byanza byànyi muulu, pambèlu apu mwînshì mwà micì yà pins. Mèmè è kutàngila ku mùtootò wà mu dindà. Mèmè kudyàmbidila nè: “Kaa, tàngilà kùnweku, cidì bidimu makùmi ànaayi nè bîtaanu bingenzèle.” Mèmè nè: “Kaa, tàngilà kùnweku. Ndi ngènda ngèla minyèngù. Byanza byànyi byènda byèla minyèngù; nsukì yènda yitùuka; mènù byènda bitùukà. Kaa, cidì bidimu makùmi ànaayi nè bîtaanu bingenzèle’s wè! Kàdi,” Mèmè nè: “tààngilà dyàmwàmwà dyàdya, mùtootò wà dindà wàwa wùdi ànu mwîmpè nè wùkenka ànu mwàkadìbi mu ditùkù òvwà Nzambì mwènzè nè: ‘pùùù,’ kuwùpùdijaYè mu byanza Byèndè, nè kwamba nè: ‘Ùkènkè!’”

136 Ki mèmè kwela meeji ku Mufundu ewu. Mèmè nè: “Kàdi Nzambì wàkalaya nè, bu twètù mwà kwikala nè lungènyi nè kukùdimuna bààbûngì ku bwakàne, netùtambè kukenka kutàmba mìtootò bwà kashidi.”

137 Mèmè kudyàmbidila nè: “Mùtootò wà dindà, wêwè udi munkaci mwà kukenka mpindyewu, kàdi indilà too nè patwàfikà Kwàka! Àlèluuyàh! ‘Kukenka kutàmba mìtootò bwà kashidi!’”

138 Nènku mvwa mwà kuumvwa cipeepèlè aci cipweka kakùnà aku, ànu pâmwe nè ku dipàtuka dyà dîbà, cyènda cyèla tushibà mwînshì mwà micì yà pins amu, lwàmba nè:

Kudi Buloba dyàmwàmwà dyà musùlu,
Butùdi tubiikila nè bupòlè bwà kashidi,

Nè tudi tukafika ku cisabu aci ànu ku cipidi
 cyà diitabuuja;
 Ku umwe ku umwe tudi tukafika ku ciibi aci,
 Bwà kusòmbelamù pàmwe nè bàdì kabàyi
 bàfwa,
 Pàdìbo bèèla ngonga yà ngòlò ayi bwèbè wèwè
 nè bwànyì mèmè.

139 Cintu cinène kaayipu's wè! "Aba bìikalà bàà lungènyi
 nebàkoke bààbùngì ku bwakàne, nè nebàbàlakanè kutàmba
 mìtootò bwà kashidi nè kashidi."

140 Pa nàнку bidi bishintulula cinyi's, twamb'eku twamb'eku?
 Citùpà cikesè cyà kale cyà dībà eci ncyà bwalu kaayi mwaba
 ewu's? Lupwishi lukesè lwà buloba elu, musàndà wùdì kawùyì
 nè mwongo, mubidi mukesè wà kale wà cifwàkà wùdì nè
 cyà kubola nè kwalukila ku lupwishi, nè misàndà yà mu
 dikòbà neyiwùdyè's! Kaa, ekèlekèlè! Lekèlaayi njuukè nè byònsò
 bìdì munda mwànyì, bwà nkenkè bwà butùmbi bwà Nzambì!
 Kutèeka ku luseke bujitu bwònsò, bwà Nyumà Mwímpè wàmòna
 mwà kusambuluja makolè Èndè nè butùmbi, ku diyiisha dyà
 Èvànjeeliyò nè dyondopa dyà babèèdì, bwà kushìndika Yesù
 Kilistò mubiike ku bafwè. Kaa, ekèlekèlè!

. . .bwà kashidi nè bwà kashidi.

*Kàdi wèwè, . . .Danyèlè, bùta mèyì, nè twàku
 mukàndà awu citampì, too nè ku cikondo cyà
 nshùikidilu: bwalu bààbùngì nebànyeemè bàtwa eku nè
 eku, nè dimanya nedivulanganè.*

*Pashìishe mèmè Danyèlè ngàkamòna nè kutàngila, nè,
 mònaayi, kùvwa bakwàbò bàbìdì biimàne mwaba awu,
 ewu ku elu luseke lwà mwelelu wà musùlù, nè mukwàbò
 ku lukwàbò. . . luseke lwà mwelelu wà musùlù.*

*Nè ewu kwambila muntu uvwa muvwàle bilàmbà byà
 linà (Nyumà Mwímpè), uvwa pa màyi awu (bisàmbà nè
 misùmbà) . . .*

141 Nyumà Mwímpè pa bantu's! Kaa! Àlèluuyàh! Nyumà
 Mwímpè's wè!

142 Bwàkabuulwibwà: 15, :16, ùdì wàmba nè mupimbu nè
 misùmbà. . .màyi àdì ùmvwija nè "mupimbu nè misùmbà yà
 bantu."

143 "Kàdi's ke Kampàndà ewu muvwàle cilàmbà cyà linà
 mutòòke, ùDikùpa ùbànda ùpweka, pa màyi, nè cyanza Cyèndè
 cyela muulu mu Dyulu, ùdìcipa kùdì Ewu udi nè mwoyi kashidi
 nè kashidi nè: 'Penzekà bintu ebi, kakwàkwikalà kàbìdì cikondo
 to!'" Àlèluuyàh!

144 "Cikondo kacyàkwikalakù kàbìdì to!" Kudìcipa nàнку,
 patwàmòna matùnga àkòsoloka, nè bintu byènzeka mùshindù

awu nè: “Bwalu busokoka bwà Nzambi bùkaadi humanè kukumbana.”

145 Ncinyi aci: “Bwalu busokoka bwà Nzambi”? “Nzambi munda mwèbè, ditèkemenà dyà Butumbi,” ùkenka, dibàtiiza dyà Nyumà Mwîmpè!

146 Pashîishe kwambaYè nè: “Pènzekà bintu ebi, kakwàkwikala kàbìdì cikondo to.”

147 “Aba bàdì bamanyè Nzambi wabò,” mwàkambà Danyèlè. “Mu matùkù à ndekeelu, bààbùngì nebànyeemè bàtwa eku nè eku, dimanya nedivulanganè. Kàdì aba bàdì bamanyè Nzambi wabò nebènzè maalù à kukèma mu matùkù à ndekeelu.”

148 “Nebènzè byenzedi byà bulòbo.” Kaa, byenzedi byà bulòbo byà diitabuuja bìdì munkaci mwà kubwayika, pa buloba bujimà, dilòlòlò edi, misangu nè misangu. Mu matùnga ònsò, tumpanyè tunène! Mpofo yidi yimòna. Mpudimaci yidi munkaci mwà kutèeleja. Balèma bàdì bènda bèndela kuulu. Bantu bàà mishindù yònsò yà mwoyi bàdì bàbwela, bàdì bààkidila Nyumà Mwîmpè; kî ng’ànù bapèlè nè bàdì bàdikoonya mashi bitùuka to, kàdì beena ntèntè mu nzùbu ntèntè pambèlù nè bikwàbò byònsò. Nzambi ùdì wàngata nè ùvwàdika muntu nè muntu yònsò mùzàbì Wèndè pambidi, nè ùbàpèèsha dibìikila dyà ku Didyà dyà Dibanjì.

149 Nè Mwakwidi Munène, Melekisedekè, neàlwe dîngà ditùkù. Nènkù netùdye mèèsà à Mukalenge, cyàkàbìdì, pàmwè Nèndè, mu Bukalenge bwà Nzambi, dimwè dyà ku matùkù manène, à butumbi aa! Kaa, ndi nè disànkà dyàbùngì, dilòlòlò edi, dyà kwikala mu Bukalenge Bwèndè! Eyowà’s, mukalenge. Ditùkù kampàndà dinène, ditùkù kampàndà dyà dikèmesha: “Kakwàkwikala kàbìdì cikondo to!”

150 Nwamònu’s, tuvwa bapàtùkile mu Cyendèlèlè. Tuvwa, kumpàlà kwà kwikalakù dyulu nè buloba. Nuvwakù bamanyè nànkù anyi? Nzambi wàkenza muntu mu cimfwànyì Cyèndè Sungasunga.

151 “Wàkadì penyì,” mwakambilàYe Yobò, pààkeelà Yobò meeji nè ùvwa nè lungènyì kampàndà. Yèyè nè: “Wèwè uvwa penyì pàmvwà ntèèka cishìmikidi cyà dyulu nè buloba, kumpàlà kwà Mèmè kucitèeka, pàvwà bàna bàà Nzambi bimba pàmwè nè mìtootò yà mu dindà yèlè mbilà yà disànkà apu?”

152 “Mìtootò yà mu dindà yàkeela mbilà yà disànkà.” Yòyì yìvwà yìkenka ayi yàkeela mbilà yà disànkà, pààkamònyì nè dîngà ditùkù yìvwà nè cyà kusòmbela pa buloba apa. Nènkù Mfùmù, Melekisedekè awu, ùvwa mwà kulwa mu bwakànè bwà Nzambi, nè kufila mwoyi Wèndè, bwà kutùpikula bwà Nzambi, kutwàlujà cyàkàbìdì, nè kukenka kutàmba mìtootò bwà kashidi nè kashidi.

153 “Uvwa penyì pàmvwà Mèmè ntèèka cishìmikidi cyà buloba? Ngambilè mwaba wùvwàbu bukùdikilakù. Ngambilèku pàdibu

bwimànyine.” Yèyè nè: “Diswike mukàbà. Ndi muswè kwakula neebè bu muntu mulùme.” Ke Yobò kupònayè mutwè mpàla panshì bu muntu mufwè. Kàvwa mwà kucitwàla to. Nzambì ùvwakù. Ki bwalu mbwòbù abu’s. “Wàkadi penyì pàmvwà Mèmè ntèeka bishimikidi byà buloba?”

¹⁵⁴ Èvànjeeliyò wa butùmbi ewu mmwamba mu cipròfetà kùdì bapròfetà bàà Dipungila Dikùlukulu. Mmulwè munda mwà bikondo. Ùdi mwab’ewu dilòlòlò edi. M’Mushindikiiibwe kùdì Nzambì. Mmutangàlake buloba bujima. Mbateetè kuMwela pambèlu.

¹⁵⁵ Kàdi, teetà bwà kujima kapyà mu ditùkù dyà lupeepà lukolè, nè—nè mucì mùmè kumpàlà kwàwù. Mòna’s, kwèna mwà kucyènzà to. Paùdì utàmba kukàlwisha, ke paùdì utàmba kukàpèèsha lupeepèlè; pawàtàmba kukàpèèsha lupeepèlè, nekàtambè koosha. Ke cintu cimwèpelè ncyòci aci.

¹⁵⁶ Kale wàwa tuvwa twenza kapyà kakesè, ku mikùnà kwàka, pàmvwà nteeta kuteemesha kapyà kumpàlà kwà dîbà mu dindà. Mvwa mwà kupàtuka kwelamù ndambù wa nkùnyi; mwîshì ùbanga kufùkuka. Ndi mumanyè nè, ànu mùdìbì bushùwà nè kùdì mwîshì mukesè, kùdì kapyà muntwamu mwaba kampàndà. Cintu cimwèpelè cívwa cikèngela bwà mèmè kwenza nkwangata cifulu cyànyi nè kubanga kuwùpeepula, nè ndekeelu wa byònsò kukwàtakù.

¹⁵⁷ Ke cìdì Èkèleeziyà naaci dijinga leelù ewu, ndituuta dikwàbò dyà Cipeepèlè cikolè cyà cívuma bu cyàkapwekà mu Ditùkù dyà Mpenta aci, bwà kuMupuupija cyàkàbìdì mu Diitabuuja, bwà kwakidila Mukalenge Yesù Kilistò ku dilwa Dyèndè mu Butùmbi.

¹⁵⁸ Tàngilàayi bimanyinu, maalu à kukèma, bintu bìdì kabiyi byùmvwika munkaci mwà kwenzeka. “Dikanka dyà buloba mu myaba mishiilèshiiàngàne; mavwala à màyi à mbù àpàsalala ku mwelelu aku,” ànu mwàkambà Yesù nè neénzè amu: “myoyi yà bantu yàmba kwimana; bwôwà.”

¹⁵⁹ Bwôwà: “Kaa, nganyì wèlà bômbè bwà cobalt kumpàlà? Cìikalà mwà kwenzeka ncinyi? Mu mèbà makesè buloba bujima nebùbutudiibwè.” Mòna’s, tudi bafwànyine kwikala mu Bwikadi bwà Nzambì pàdibu ànu bùmata bùpàtuka mu ndèkè. Ncyà bushùwà. Neciikalè cinyi? Kakwàkwikala cintu nànsha cimwè to, kàdi netùponè. . .

Mùzàbì wà kale wà mubidi ewu
netùwumacishè, nè kubiiika
Nè kubàkula difutu dyà kashidi,
Nè kwela mbilà, patwikalà twenda tupicila mu
mpeepèlè apu nè:
“Nwàshàlaayi bimpè, nwàshàlaayi bimpè,
dìbà dyà kalolo dyà disambila!”

¹⁶⁰ Byônsò nebìjikè, nè netwàlukilè Kumbèlu. Tushiya mubidi wà kale ewu; kuwùshintakaja nè cifulu cyà butùmbi nè mùzàbì, dyàmwàmwà, wikalà kawùyi mwà kujìmina nànsha. Kukùdimuka kuumuka ku muntu mulùme mukùlàkàjì, mukàjì mukùlàkàjì, kuya ku bunsongàalùmè, bwà kwikala nè mwoyi kashidi nè kashidi, kukenka kupita; nè dibènga-kufwà, bwà kubànda kupweka mu mìsèèsù yà Butùmbi, mu Bwikadi bwà Mukalenge Yesù Kilistò. Kwimba nè: “Butùmbi kùdì Nzambi mu Myaba mitàmbe kutùmbuka! Yèyè mmwenzè bintu binène munkaci mwètù.”

¹⁶¹ Patùcidì mu lwendu leelù ewu apa, nè Bukolè bwà Nzambi bwikàle bùshindika bintu byônsò ku nseka yônsò, tùkenzakanaàyi nè tùmonè mwaba utùdì tusanganyibwa. Tàngiààyi mucì wà mfigì mùdiwu munkaci mwà kwela ntòngà. Tàngilààyi micì mikwàbò mùdiyi yèla ntòngà. Tàngilààyi matùngà mùdiwu èla ntòngà. Tàngilààyi mùdì Èkèleeziyà wa Nyumà Mwimpè wèla ntòngà. Tàngilààyi mùdì Mpenta munkaci mwà kwenzuluka, wàlukila, bimanyinu bimwèbimwè nè maalu à kukèma. Àlèluuyàh!

Tùsambilàayi.

¹⁶² Taatù wa mu Dyulu, tudi tuKusàkidila dilòòlò edi, bwà Bukolè bwà dibìikà dyà ku lufù dyà Yesù Kilistò, bwà Buumùntù Bwèndè bunène bwà kumutù kwà byônsò abu, bwà dilaabiibwa Dyèndè dyà Nyumà Mwimpè. Tudi tuKusàkidila bwalu Yèyè ùdi kaaba aka mpindyewu, mwikàle nè mwoyi, mwikàle nè mwoyi kashidi, mwikàle wàkwila pa ditonda dyètù. Tudi tuKusàkidila bwà Bukolè Bwèndè bwà dyondopa bùdì butùbàkùle bu bimunyi byà kapyà, Mukalenge, butùmùshe mu lukità, mmütùbìishe nè muvwijùlùle dikànda dyètù dipyadiyà, nè mutùpèèshe Bukolè, bwà twamòna mwà kupàtuka nè kukenkesha mu mîdimà eyi. Tudi tuKusàkidila bwà cyòci eci.

¹⁶³ Taatù, tudi tulòmba bwà Ùbeneshèku ewu yônsò udi kàyì musùngìdiibwe awu. Bènesàku bônsò bàdì basùngìdiibwe abu. Enzàku nàнку, Taatù. Ondòpàku babèèdì bônsò; angàtàaku butùmbi. Bènesàku kaatabernacle kakesè aka. Bènesàku bantu. Bènesàku Mwanèètù Neville, mpaasàtà. Bènesàku balami bônsò, balubuludi. Enzàku nàнку, Mukalenge. Bàtèntèkèlè byanza Byèbè byà dyondopa abi. Nènku dyabùlù yèyè mubwele nè mujuule tuumaalu tukesè twà tulumbùlumbù, ùbyòndòpè, Mukalenge, nè lùkàsà lwônsò, nè Bwanga bwà Gilàdà. Enzàku nàнку, Mukalenge. Icìkijàku maanyì à dilaabiibwa pambidi pààbò. Bàvwijèku badipwekèshe mu mwoyi, bàà kalolo mu musùukà. Swàkù bwà bèndè mu makàsà à Mukalenge Yesù. Bintu byà mubidi bìdì bibenzekela, nè bashààle babèèdì, swàkù bwà Mwanjèlò wa Nzambi àseemenè pabwìpì, bwà kulaaba Mashì à Yesù. Enzàku nàнку. Ondòpàku bubèèdì bwônsò.

¹⁶⁴ Nkwàcìshèku, Mukalenge, pàndi mpàtuka nya mu madimi à bwambi mwàmwa, mmòna dijinga dinène adi. Dikèngela kaayipu mu ditùkù edi's wè! Miliyò yà bantu mmifwè. Bampàngaanù binunu lukàmà nè makumi ànaayi nè binaayi mbafwè leelù ewu, kabàyi bamanyè Kilistò to. Nkwàcìshèku, Nzambì Munanga. Tùbènèshèku bònsò, pàmwe.

¹⁶⁵ Nè dīngà ditùkù, watùbiishakù mu buloba ebu, dyàmwàmwa, Mukalenge, bwà kusòmba Neebè mu nkwasà Webè wa butùmbi, mu myaba yà mu Dyulu mwàmwa, mu Kilistò Yesù. Enzàku nànkù, Taatù. Too nè ku diine dībà adi, swàkù bwà bukolè bwà mubidi nè dikàndà biikalè byètù, bwalu tudì tulòmba nùnkù mu Dīnà dyà Yesù. Amen.

Kaa, ndi muswè kuMumòna, ndi muswè kutàngila mpàla Wendè,

Kuntu kwàka bwà kwimba kashidi bwà ngàsà Wendè udi usùngila;

Mu misèsèsù yà Butùmbi mbandisha dīyì dyànyì;

Ntàtu yònsò yàjikì, ndekeelu wa byònsò mèmè Kumbèlu, bwà kusànkà kashidi.

Mùndi ngendela mu ditùnga edi emu, ngènda ngimba pàndi nya apu,

Mfunkwina misùùkà ku Kàlvariyò, ku nkwakà mukùnze,

Mikete yàbùngì mmitùbùle musùùkà wànyì munda, nè pambèlu;

Kàdi Mukalenge wanyì ùdi ùndombolamù, ku Yèyè nkùndì nè cyà kucimuna.

Kaa, ndi muswè kuMumòna, ntàngila mpàla Wendè,

Kuntu kwàka bwà kwimba kashidi bwà ngàsà Wendè udi usùngila;

Mu misèsèsù yà Butùmbi mbandisha dīyì dyànyì;

Ntàtu yònsò yàjikì, ndekeelu wa byònsò mèmè Kumbèlu, bwà kusànkà kashidi.

¹⁶⁶ Mpindyewu tèèlejàayi, katancì kakesè cyanàànà. Mba-Méthodistes bùngì kaayì bàdì kaaba aka? Elàayi byanza muulu. Ba-Méthodistes? Mba-Baptistes bùngì kaayì bàdì kaaba aka? Elàayi byanza muulu. Mba-Presbytériens bùngì kaayì bàdì kaaba aka? Elàayi byanza muulu. Mba-Nazaréens bùngì kaayì? Elàayi byanza muulu. Mbeena Mpenta bùngì kaayì? Elàayi byanza muulu. Mba-Luthériens bùngì kaayì? Elàayi byanza byènù muulu. Èè, tudì bònsò kaaba aka. Tàngilàayi, musùmbà munène menemene, musambàkàne, bònsò basòmbe mu mwaba wùmwèpelè, mu myaba yà mu Dyulu, bàcyònkómoka mu Dibènesha.

¹⁶⁷ Mpindyewu ndi muswè bwà ba-Méthodistes bàlabulanganè ku byanza nè ba-Baptistes, ba-Baptistes nè ba-Luthériens. Kudimuka mpindyewu ùlabulanganè ku cyanza muntu nè mukwèndè, kàdi wàlukile mu nùnkù ewu, mpindyewu, patùdi tuwimba apa.

Mfunkwina misùùkà ku Kàlvariyò, ku nkwaka mukünze,
 Mikete yàbûngì mmitùbùle musùùkà wànyì munda, nè pambèlu;
 Kàdi Mukalenge wanyì ùdi ùndombolamù, ku Yèyè nkùndì nè cyà kucimuna.
 Kaa, ndi muswè kuMumòna, ntàngila mpàla Wèndè,
 Mwaba awu bwà kwimba kashidi bwà ngàsà Wèndè udi usùngila;
 Mu misèèsù yà Butùmbi mbandisha dīyì dyànyì;
 Ntātu yònsò yǎjiki, ndekeelu wa byònsò mèmè Kumbèlu, bwà kusànka kashidi.

¹⁶⁸ Aci kacyèna cinùfikishakù ku didyùmvwa bilenga anyì? Kacyèna cinùfikishakù ku didyùmvwa bu nè nudi bònsò...? Mbeena Kilistò bûngì kaayì bàdi kaaba aka? Elàayi cyanza muulu. Muntu yònsò udi witabuuja Mukalenge Yesù Kilistò, elà cyanza muulu. Kaa, ekèlekèle! Cintu cilenga kaayipu's wè!

¹⁶⁹ Mpindyewu patùdi tutàpuluka apa, patùdi tuya apu, nè ku mbànzà yètù mishìlèshìlàngàne, tuyaayi nè disambila. Mpindyewu twìmbàayi musambu wètù mulenga, wà kale wà ditangalajangana naawù awu. Mbanganyì bàdi bawùmanyè? *Angàtā Dīnā Dyā Yesù Wēndē Naadī.* Bònsò cyàpàmwè mpindyewu, twìmbàayi.

Angàtā Dīnā dyā Yesù wēndē naadī,
 Wēwē mwānā wa tunyinganyinga nè dikènga;
 Nedìkupè disànka nè busàmbi,
 Ndā naaDī, kwònsò kuyaayà.
 Dīnā dyā mushinga, (Dīnā dyā mushinga!) Éyì dyā bupòle be! (Éyì dyā bupòle be!)
 Ditèkemena dyā buloba nè disànka dyā Dyulu;
 (Éyowà, Dīnā dyā mushinga!) Éyì dyā bupòle be!
 Ditèkemena dyā buloba nè disànka dyā Dyulu.

Tèèlejàayi:

Twìnaminàayi Dīnā dyā Yesù,
 Tupòna mikookwela ku makàsà Èndè,
 Mfùmù wa bamfùmù mu Dyulu netùMwasè cifulu cyà butùmbi,
 Kaa, pààjika lwendu lwètù.

Dîna dyà mushinga, Éyì dyà bupòle be! (Éyì
dyà bupòle be!)

Ditèkemena dyà buloba nè disànkà dyà Dyulu;

Dîna dyà mushinga, Éyì dyà bupòle be!

Ditèkemena dyà buloba nè disànkà dyà Dyulu.

¹⁷⁰ Cîndì muswè bwà wêwè kwenza ncyôcì eci.

Angàtà Dîna dyà Yesù wëndè naadì,

Bu Ngabu kumpàlà kwà mulwishì;

Pààkujìngilà mateeciibwa ku nseke nè ku
nseke,

Nungana Dîna dyà Cijila adi mu disambila.

Dîna dyà mushinga, (Dîna dyà mushinga!) Éyì
dyà bupolè be!

Ditèkemena dyà buloba nè disànkà dyà Dyulu;

Dîna dyà mushinga, (Dîna dyà mushinga!) Éyì
dyà bupolè be!

Ditèkemena dyà buloba nè disànkà dyà Dyulu.



55-0109^E Mbangilu Nè Ndekeelu Wa
Cipungu Cyà Bàà Bisàmbà Byà Bendè
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org